

Tutu ñaovi tì'ví taPablo kua'an ña nda'a taTimoteo

TaPablo tì'ví ra to'on yó'o ña chindeé ra taTimoteo

¹ Yi'i, taPablo, ñii taapóstol ta kisa chiño noo Jesucristo kuuji, chi saá kóni Ndios. Ta Ndios tì'ví ra yi'i ña ka'an ndosoji to'on ra noo ñivi. Ta ká'anji xí'in ñivi ndí Ndios táxi ra ña kutaku na xí'in ra ndi'i saá kivi, tá ndino'o ini na kándixa na Jesucristo. ² Táa i tutu yó'o ña xaá ña nda'a yó'ó, taTimoteo. Ta yó'ó, ndatán yóo sa'ya i ta kí'vi ní ini i xini i, saá yóo ún noo i. Ta vitin kóni i ndí Yivá yó Ndios xí'in Jesucristo ta xá'nda chiño noo yó, ná kundá'ví ini ra koni ra yó'ó, ná ke'é ra ñava'a ní xí'in ún, ta ná taxi ra ña koo va'a ini ún.

TaPablo táxi ra ña táxa'vi ña'á nda'a Ndios xa'a taTimoteo

³ Ndi'i saá kivi ndúkúji ñava'a xa'a ún noo Ndios, ta ká'anji táxi i ña táxa'vi ña'á nda'a ra xa'a ún. Ta ñii ki'va ndatán kuiya xina'á kisa to'ó naxiji xitanji Ndios, saá ndino'o ini i kisa to'ó i Ndios vitin. ⁴ Ná ká'anji vitin ndasaá xaku ní ún xa'a i kivi ñindayi tá'an yó, ta xa'a ñayó'o kóni ní koto i yó'ó vitin ña kuchiño kusiji ní ka ini i. ⁵ Chi ndixa xini i ña ndino'o ní ini ún kándixa ún Jesucristo. Si'na xitan ún ñáLoida kándixa, ta saá kándixa si'í ún ñáEunice, ta vitin

kúndaꝯ ini i ña ñii kị'va saá kándixa va'a mịi ún Jesucristo.

On vá'a kuka'an noꝯ yó

xá'a to'on ñava'a ña ká'an xá'a Jesucristo

⁶ Xá'a ñayó'o ndúkú i noꝯ ún ña on san-dakoo ún koni ñó'ó ún ndee va'a ña saní'i Níma Ndios yó'ó kịvi chịnóo i nda'a i sịni ún, chi ndee va'a ñaki'in ún, ndátán yóo ño'o xixi, saá yóo ña, ta xini ñó'ó kundaa va'a ún ña, ña on nda'va ña. ⁷ Chi Níma Ndios ña taxi ra koo xí'in yó, on sịvi níma ña ké'é ña nduu yó nịvi na yí'ví ini kúu ña, ta Níma ña taxi Ndios koo ña ini mịi yó chíndee ña nduu yó nịvi na ndakú ini. Ta Níma Ndios táxi ña ndee, ña kuchiño yó kuki'vi ini yó koni tá'an yó, ta kuchiño yó nasita xí'in mịi yó noꝯ ña on vá'a. ⁸ Xá'a ñayó'o, on kuka'an noꝯ ún ndakuijn ún ká'an ún to'on ñava'a xá'a Jesucristo, ta ni on kuka'an noꝯ ún xá'a yị'i, ta tá nákaꝯ ini ve'e káa xá'a Jesucristo. Tá mií ká, koo ti'va ún xí'in ndee ña nátaxi Ndios nda'a ún, ña kuchiño ún xo'vi ún, ñii kị'va ndátán xó'vi yị'i xá'a to'on Jesucristo. ⁹ Ndios sạkaku ra mịi yó ta ñakana ra mịi yó ña kuu yó nịvi na kutaku ndii noꝯ ra, ndátán kóni ra. Ta on sịvi xá'a chiño va'a ña ké'é yó kúu ña ké'é Ndios ñava'a yó'o xí'in yó, ta xá'a ña chítóni mịi Ndios xí'in ña ká'no ini ra, ta xá'a ñava'a kịsa ndivi Jesucristo xá'a yó, Ndios sạkaku ra yó ta ñakana ra yó ña kúu yó nịvi na ndíkõn yichị ra. Saá chítóni Ndios kịvi tá'án ká kixá'á koo kịvi noꝯ ñoyívi yó'o. ¹⁰ Ta vitin Ndios xa saná'a ra mịi yó ndi tá ká'no ní ini kúu ra, chi tị'ví ra Jesucristo kịxaꝯ ra ñoyívi yó'o, ta tayó'o sandi'i ra xá'a ndee ña xá'ni nịvi.

Ta xí'in to'on ñava'a ña ká'an xa'a Jesucristo ndasaá sákaku ra ñivi, Ndios saná'a káxín ra mji yó ndasaá kuchiño kutaku yó xí'in ra ndi'i saá kivi ña vaxi.

¹¹ Ndios sakuiso chiño ra yi'i ña ka'an ndoso i to'on ñava'a yó'o xa'a Jesucristo, ta sakuiso chiño ra yi'i kúu i taapóstol xa'a ña saná'a i ñivi na on vása kúu najudío. ¹² Xa'a ña kisa ndivi i chiño yó'o ña sakuiso chiño ra yi'i, vitin xó'vi i ndi'i tondó'ó yó'o. Ta saá ni, on vása kúka'an noo i xa'a ndi'i ña xó'vi i, chi xini káxín i yu kúu ta ta kándixa i, ta ndixa ndáa ini i ndí kómí ra ndee ña kundaa va'a ra to'on ra ña taxi ra nda'a i, ta saá ñivi na kándixa ra ka'an ndoso na to'on ra anda kixaa kivi ña ndikó Jesucristo ñoyívi yó'o.

¹³ Ta xini ñó'ó ún kundikon va'a ún yichi ña ndaa ña kúu ña saná'a i yó'ó. Ta on sandakoo ún ña kandixa ún Ndios, ta ni on sandakoo ún kuki'vi ini ún koni ún natá'an yó, saá chi ndee ña kutaku yó saá kúu ñava'a saní'i Jesucristo mji yó xa'a ña kándixa yó ra. ¹⁴ Ta xí'in ndee Níma Ndios ña yóo ini mji yó, xini ñó'ó kundaa va'a ún to'on ña ndaa ña sakuiso chiño Ndios yó'ó xa'a ña va'a ndato'on ún ña xí'in ñivi.

¹⁵ Xa xini ún taFigelo xí'in taHermógenes xí'in ku'a ní ñivi na kándixa Jesucristo na ndoo ku'a ñoo noo ño'o Asia, xa sandakoo na yi'i, ta nda lo'o on xin na koni ka na yi'i. ¹⁶ Ta taOnesíforo, on vása ní-ke'é ra saá, chi ku'a ní yichi ndasa va'a ra ini i. Xa'a ñava'a ke'é taOnesíforo xí'in i, ndúkú i noo Ndios ña kundá'vi ini ra koni ra tayó'o xí'in nave'e ra. Saá chi tayó'o on vása ní-kuka'an noo ra xa'a yi'i, vará xini ra yi'i yóo i

nó'nijí xí'in kaa ini ve'e kaa. ¹⁷ Nda víka, kivi kixaa taOnesíforo ñoo Roma yó'o, ta nandukú ní ra yí'í anda naní'i ra yí'í. ¹⁸ Ta saá, kivi tondaa ña kasa nani Ndios kuachi ndi'i ñivi ñoyívi yó'o, ndati j ná kundá'ví ini Ndios koni ra taOnesíforo. Ta mji ún, taTimoteo, xini va'a ún xa'a ndi'i ñava'a ke'é ra ña chindeé ra mji yó kivi ñixiyo yó ñoo Éfeso.

2

Tq'on yó'o ká'qn ndi'i ñivi na kándixa Jesucristo xini ñó'ó kundefé va'a na noq ña xq'vi na xa'a ra

¹ Ta yó'ó, tata Timoteo, ndatán yóo sa'ya j saá yóo ún, ta ndúkú j noq ún ña chikaa ún ndee ini mji ún chi xa kómí ún ñava'a ña taxi Jesucristo nda'a ún. ² Xa xini so'o ún to'on ña ñika'an ndoso j noq ku'a ní ñivi. Ta vitin yó'ó xini ñó'ó ún nakaxin ún nataa na va'a ndíkon yichi Jesucristo, na kúu na ti'va saná'a ñivi. Ta sakuiso chiño ún nataa yó'o ña saná'a na inká ñivi ndatán yóo to'on ña xini so'o ún ñika'an j.

³ Ta yó'ó, tata, ndatán yóo ñii tropa ta on vása yí'ví xq'vi xa'a chiño ña kisa ndivi ra, ñii kiva saá koo ti'va ún xq'vi ún xa'a Jesucristo. ⁴ Nda ñii tātropa on vása xáni sini ra xa'a inká chiño, chi ndasaá kuiti táku ra ña kasa ndivi ra chiño ra ña sakusij ra ini ta xá'nda chiño noq ra. ⁵ Ta yóo ñii ta ta ku'a'an kono xí'in inká na xino ña koto ñivi yu kúu ta ta ndeé ka va'a xino, ta tayó'o xini ñó'ó kándixa ra ndayí ña xá'nda chiño ndasaá xini ñó'ó kono nataa. Tá ñii ta xino yó'o, on vása kándixa ra ndayí, ta on kuchiño ra naki'in ra

ñava'a ña táxi na nda'a ɬa ɬa kúndeé xaá si'na nɔɔ ndi'i na xíno xí'in ra. ⁶ Saá tuku tá yóo ñii ɬa ɬa ndeé ní kisa chiño nɔɔ ño'o ra, ta ɬayó'o kómí ra ndayí kuu ra ɬa ɬa si'na koni ñó'ó ña sakee ra. ⁷ Va'a kani sɪni ún xa'a ɬo'on yó'o, chi Jesucristo chindeé ra yó'ó ña kundaá va'a ini ún ndi'i ɬo'on ña ndaɬo'on i xí'in ún.

⁸ Naká'an ún xa'a Jesucristo, kaaku ra ɬixin ñii ña'a ñasa'ya ñani síkuá ɬarey David, ta ɬixi'i ra ta naɬaku ra. Ñayó'o kúu ɬo'on ñava'a ña ká'an ndoso i nɔɔ ni, ⁹ ta xa'a ɬo'on yó'o xó'vi i vitin, ta ndatán yóo ñii ɬa ɬa kómí kuachi ká'no, saá yóo i, chi nó'ni i xí'in ka. Ta ɬo'on Ndios on sivi ña nó'ni kúu ña, ta kúchiño kuɪta ní'no ndíka ña ndi'i saá xiiña nɔɔ ni. ¹⁰ Ta saá kúndeé i xó'vi i nɔɔ ndi'i tondó'ó, xa'a ni na ɬikaxin Ndios kandixa na Jesucristo ta sakaku ra na, ta saá kutaku na xí'in ra ndi'i saá kivi ña vaxi nɔɔ yóo ñalivi, ña va'a ña yé'e.

¹¹ ɬo'on ña ndixa ndaa kúu ñayó'o:

Tá ɬixi'i yó xí'in Jesucristo, ɬa ɬa ɬixi'i xa'a kuachi yó, ta saá tuku ndixa kutaku yó xí'in ra.

¹² Tá kúndeé yó xí'in ndi'i ña xó'vi yó ñoyívi yó'o, ta saá kivi vaxi ka'nda chiño yó xí'in Jesucristo.

Tá ka'an yó on vása xini yó ra, ta saá ka'an ra on vása xini ra mi yó.

¹³ Tá on vása kasa ndivi yó ɬo'on ra, ta saá ni, Jesucristo ndixa kasa ndivi ra ɬo'on mi ra, chi ndixa ndasaá kuiti ɬandaá kúu ra, ta nda lo'o on kúchiño nasama xí'in mi ra, káchí ɬo'on ña ndaa.

*Ta Pablo ndátò'on ra xí'in ta Timoteo
ná chikaq ra ndee ña va'a ní kasa ndivi ra chiño
Ndios*

¹⁴ Ndi'i saá kivi sanaká'án ún nivi na ndíkon Jesucristo xa'a to'on yó'o. Ta noq Ndios ndatò'on ún xí'in na ña on ña na xa'a to'on. Saá chi ña maní kuu ña kani tá'an na xí'in to'on xa'a ña on vása ndaya'ví, ta ña ké'é na saá sáti'ví ña ini nivi na xini so'ó ñayó'o. ¹⁵ Chikaq ún ndee ña sakusij ún ini Ndios, ta saá kuu ún taq ta ndaya'ví noq ra. Xini ñó'ó kuu ún taq ta kisa chiño va'a, ña on kuka'an noq ún xa'a ñava'a kisa ndivi ún. Ta xini ñó'ó kuu ún taq ta ndixa xini va'a sáná'a to'on ña ndaa. ¹⁶ Kuxiká ún noq to'on ña on vása ndaya'ví, to'on ña ká'an nivi na on vása ndíkon yichi Ndios, chi ñii ñii kivi vaxi kua'no ña on vá'a ké'é nivi na ká'an to'on on vá'a yó'o. ¹⁷ Ta to'on ña sáná'a nivi na on vá'a yó'o, ndatán yóo ñii kue'e tá'yí ña kuee kuee vaxi kua'no, ta sándi'i ña xa'a koñu nivi saá yóo ña. Yó'ó ta yi'i xini yó ta Himeneo xí'in ta Fileto kuu ovi taq ta sáná'a to'on on vá'a yó'o. ¹⁸ Saá chi nayó'o xa sandakoo na to'on ña ndaa, ta ká'an na sáná'a na ndí xa niya'a kivi ña sanatakú Ndios ndi'i nivi. Ta xí'in to'on vatá yó'o xa sáti'ví na ini sava nivi na kándixa Jesucristo, ña on vása kúndaq ka ini na yu kuu ñandaq. ¹⁹ Ta saá ni, Ndios xa chindú'u ra ñii to'on ra ña ndaa ña kandú'u ndi'i saá kivi ña vaxi, ta on kúchiño nasama ña. Ndatán yóo xa'a ve'e ña xa nixino saá yóo to'on Ndios yó'o. Ta ndatán yóo yuu ña chikaq na xa'a ve'e yó'o, ta nda ñii nivi on kivi ka tava na ña, saá yóo to'on ña káchí saá: “Ndios xini ra yu kuu nivi na ndixa kuu sa'ya ra.” Ta saá tuku kachí ña

saá: “Ndi'i n̄ivi na ndino'o ini kándixa Jesucristo xín̄i ñó'ó kuxíká na n̄o ña ɔn vá'a.”

²⁰ Tá yóo ñii ve'e ká'no nakuíká, ta ini ve'e yó'o yóo kuá'a ní n̄o nda'a chiño. Yóo nda'a chiño ña kuva'a xí'in kaa plata, án xí'in kaa oro. Ta xín̄i ñó'ó nda'a chiño yó'o xa'a ña kasa ndivi yó chiño ná'no ña ndáya'ví ní. Ta saá tuku yóo inká nda'a chiño ña kuva'a xí'in tón yiton, án xí'in ño'o kisín. Ta nda'a chiño yó'o xín̄i ñó'ó xa'a ña kasa ndivi yó chiño válí ña lo'o ndáya'ví.

²¹ To'on yó'o sáná'a m̄i yó, chi ndatán yóo nda'a chiño ña kuva'a xí'in oro án xí'in plata ña xín̄i ñó'ó xa'a chiño ña ndáya'ví ní, saá yóo ndi'i n̄ivi na chikaa ndee ña ndasa ndii na níma na ta va'a vivíi kutaku na ndatán kóni Ndios. Saá Ndios kúchiño kon̄i ñó'ó ra n̄ivi yó'o xa'a ña va'a kundivi ndi'i saá n̄o chiño ndáya'ví.

²² Ta m̄i ún, xín̄i ñó'ó ún nasita xí'in m̄i ún n̄o ndi'i ña ɔn vá'a ña kútoo ní nataa kuáchí ñoyívi yó'o. Ta chikaa ún ndee ña kutaku ún xí'in ñandaa, chikaa ún ndee ña xí'in ña ndino'o ini ún kandixa ún Jesucristo, chikaa ún ndee ña kuki'vi ini ún koni ún n̄ivi, ta chikaa ún ndee ña koo va'a ini ún xí'in n̄ivi. Ndi'i ñayó'o, chikaa ún ndee ña kasa ndivi ún ñii káchí xí'in nañani yó ta xí'in náki'va yó, na kúu n̄ivi na ndino'o ini kisa ká'no Ndios. ²³ On chikaa so'o ún to'on ña náa n̄ivi xa'a ña ɔn koó xa'a, ña nda lo'o ɔn vása ndáya'ví, chi xín̄i ún ndí ña káni tá'an n̄ivi ta náta'vi tá'an na, vaxi ña n̄o ña náa na. ²⁴ Ta ndi'i m̄i yó na kúu na xíika chiño n̄o Ndios, ɔn vá'a ña yó ta kani tá'an yó xí'in n̄ivi. Ta nda víka, xín̄i ñó'ó koo va'a ini yó xí'in ndi'i n̄ivi. Ta

xínjĩ ñó'ó kuu yó ñjivi na vạ'a xínjĩ ndasaá saná'a yó inkạ ñjivi, ta xínjĩ ñó'ó kuu yó ñjivi na ká'no ini xí'in ndi'i ñjivi. ²⁵ Tá yóo ñjivi na kisa toon ñoq to'on ña ndạạ, ta mji yó na xika chiño ñoq Ndios, xí'in ñato'ó ta xí'in to'on vạ'a, xínjĩ ñó'ó kạ'an yó xí'in ñjivi na toon ini yó'o ña kuchiño ndasa vạ'a na yichjĩ na. Ta ndati yó Ndios taxi ra ña nandikó ini na, ta kundạạ ini na ñandạạ. ²⁶ Ta saá kuchiño na kaku na ñoq ñanímạ ndivạ'a ká'no, chi ñandivạ'a yó'o xa sạkako'on ña na xạ'ạ ña kasa ndivi na ña kóni mji ña.

3

Kjivj kixạạ yatin ñasondí'í ñoyívi yó'o ke'é ñjivi ña ọn vạ'a

¹ Vạ'a ná kundạạ ini ún ñayó'o: Kjivj ña vạxi tá xa yatin tondạạ ñasondí'í ñoyívi yó'o koo kjivj ña yọ'vj ní xí'in kuạ'ạ ní tondó'ó. ² Saá chi ñjivi na kutakụ kjivj yó'o kuu na ñjivi na ndasaá kuiti kuki'vi ini koni xí'in mji, ta kutoo ní na kukomí na kuạ'ạ ní sị'ún, ta kuu na ñjivi na ñạ'a ní ini, ta kasa ká'no xí'in mji na. Ñjivi na ká'an ña ọn vạ'a xạ'ạ Ndios kuu na, ñjivi na ọn vasa kasa ndivi to'on ña ká'an yivá sị'í xí'in kuu na, ñjivi na ọn vasa taxi ña táxa'vi ña'á ndạ'ạ Ndios án ndạ'ạ inkạ ñjivi kuu na, ñjivi na ọn vasa kasa to'ó Ndios kuu na. ³ Ñjivi yó'o ndạ lo'o ọn kuki'vi ini na koni na ndạ ñii ñjivi, ni ọn kua'a na kasa ká'no ini na xạ'ạ ñjivi. Kạ'an na to'on visi xạ'ạ ñjivi, ta ndạ lo'o ọn nasita xí'in mji na ña ke'é na ndi'i ñoq ña ọn vạ'a. Ñjivi na yukú ní ini kuu na, ta ndạ lo'o ọn kua'a na koni na ñavạ'a ña kóni Ndios. ⁴ Ñjivi na ti'va ní sandá'ví natá'an mji kuu na,

n̄ivi na ɔn vása yí'ví ña ke'é na ndi'i ña káchí ini m̄ji na kuu na. N̄ivi na ña'a ní ini kuu na, ta ɔn vása nandukú na ña sakusij ini Ndios, chi ndasaá kuiti nandukú na ña sakusij ini m̄ji na. ⁵ N̄ivi yó'o ka'an na noo inka n̄ivi ndí na va'a ní kisa to'ó Ndios kúu na. Ta saá ni, ña ɔn vá'a ké'é na saná'a ndí ɔn vása ndíkɔn ndino'o ini na yichj va'a. Ta m̄ji ún, tata, xínj ñó'ó kuxíká ún noo n̄ivi na ké'é saá.

⁶ Ta vitin xa yóo n̄ivi na ɔn vá'a yó'o, ta sava nayó'o kúu nataa na kí'vi kuə'a ní ve'e inka n̄ivi, ta sándá'ví na náña'a ná kúu ná naa ini, ná xáni s̄inj xa kuə'a ní kuəchi ndíso. Ta násí'í yó'o ɔn x̄jin ná nasita xí'in m̄ji ná noo ña káchí ini m̄ji ná. ⁷ Ta ndi'i saá k̄ivj kúsij ini ná xínj so'o ná to'on ña xaá ña ká'an n̄ivi na saná'a, ta ɔn vása chíkaa so'o ná ña kundaə ini ná yu kúu ñandaə. ⁸ Ndatán taJanes xí'in taJambres, n̄ixiyo toon ní ini na noo taMoisés kujya x̄ina'á, ñii k̄i'va saá yóo toon ini nataa na sándá'ví náña'a vitin, chi nataa yó'o ɔn vása x̄jin na kundaə ini na ñandaə. Ta nataa yó'o ndasaá kuiti chútú ña ɔn vá'a s̄inj na, ta ɔn vása ndíkɔn na yichj Jesucristo. ⁹ Ta nataa ɔn vá'a yó'o ɔn kundeé na ke'é na ña ɔn vá'a ndi'i saá k̄ivj, chi inka n̄ivi nakoni na ndí nataa ɔn vá'a yó'o kúu n̄ivi na kí'ví s̄inj. Ñii k̄i'va ndatán kujya x̄ina'á nakoni n̄ivi taJanes xí'in taJambres ndí x̄ikuu na n̄ivi na kí'ví s̄inj, saá koo xí'in n̄ivi na ɔn vá'a yó'o.

TaPablo ndátɔ'on ra ta sákuiso chiño ra taTimoteo

¹⁰ Ta yó'ó, taTimoteo, xínj va'a ún ndi'i to'on saná'a j, ta xínj va'a ún ndasaá táku j, ta xínj ún

yu kúu ña kóniḡ tɔndaḡḡ kasa ndiviḡ ñoyívi yó'o, ta xínḡ ún ndasaá kándixaḡ Jesucristo, ta xínḡ ún ndí va'a ká'no iniḡ xínḡ ḡḡvi, ta xínḡ ún ndasaá va'a kí'vi iniḡ xínḡ ḡḡvi, ta xínḡ ún ndasaá kúndeéḡ xí'in ña xó'vḡḡ. ¹¹ Ta xínḡ ún kuḡ'a ní ña ɔn vá'a ke'é ḡḡvi xí'inḡ, chí kisa chíñoḡ ḡḡ Jesucristo, ta ndeé ní xó'vḡḡ. Saá tuku xínḡ ún ña ḡḡndo'oḡ ḡḡo Antioquía, ḡḡo Iconio xí'in ḡḡo Listra. Vará ndeé ní saxo'vḡḡ na yḡḡḡ, ta Jesucristo sakaku ra yḡḡḡ ḡḡo ndi'i nayó'o. ¹² Ndixa kúu ñayó'o: Ndi'i ḡḡvi na chíkaaḡ ndeé ña va'a kutakuḡ na yichḡ Jesucristo, xo'vḡḡ na chí ḡḡvi na ɔn xḡḡḡ koni Jesucristo saxo'vḡḡ ña'á na. ¹³ Ta ḡḡvi na ɔn vá'a, ta ḡḡvi na sándá'ví inkḡ ḡḡvi, ḡḡi ḡḡi kḡḡḡ yá'a nduu na na ɔn vá'a ka, ta ḡḡi ḡḡi kḡḡḡ va'xi sandá'ví ka na inkḡ ḡḡvi, ta ḡḡi kḡ'va saá inkḡ ḡḡvi sandá'ví na nayó'o.

¹⁴ Ta yó'ó, ḡḡi ḡḡi kḡḡḡ xínḡ ḡḡ'ó kándixa va'a ka ún ña kúu to'on ña ndaḡḡ ña xa saku'á ún, chí xínḡ ún ndixa ñandaḡḡ kúu ña. Saá chí xínḡ va'a ún ndí ḡḡvi na saná'a yó'ó kúu ḡḡvi nandaḡḡ. ¹⁵ Nda lo'o ún, tḡḡḡḡ kḡḡḡ vitin xa xínḡ ún to'on Ndios ña ḡḡtaa na xḡḡḡ'á. To'on Ndios kúchiño saná'a ña yó'ó, ta saá kundaḡḡ va'a ini ún ndasaá Ndios sákaku ra yó'ó xa'ḡ ña kándixa ún Jesucristo. ¹⁶ Ndi'i to'on Ndios ña ḡḡtaa na xḡḡḡ'á, Níma Ndios ḡḡka'an ña xí'in níma ḡḡvi, ta ḡḡtaa na to'on ra. Ta to'on Ndios yó'o va'a saná'a ña ḡḡvi, nándaxin ña ḡḡo na xa'ḡ ḡḡava'a xínḡ ḡḡ'ó ke'é na, ta to'on Ndios násita ña ḡḡvi ña ɔn ke'é ka na ña ɔn vá'a, ta saná'a ña ḡḡvi ndasaá xínḡ ḡḡ'ó va'a kutakuḡ na ndatán kóni Ndios. ¹⁷ Xa'ḡ ñayó'o ndi'i mḡḡḡ yó na ndíkɔn yichḡ Ndios va'a koo ti'va yó, ta saá ndixa kuchiño kasa ndivi yó

ndi'i noo chiño va'a.

4

Xíni ñó'ó ní tãTimoteo ka'an ndoso ka ra to'on Ndios nivi

¹ Kivi vaxi nativi Jesucristo ña ka'nda chiño ra noo ndi'i nivi ñoyívi yó'o, ta kasa nani ra kuachi ndi'i nivi, án na táku kuu na, án na xa nixi'i kuu na. Ta vitin xito Ndios xí'in Jesucristo ña sákuiso chiño i yó'ó ² ña chikaá ún ndee ka'an ndoso ún to'on Ndios ndi'i saá kivi noo nivi. Xíni ñó'ó ke'é ún saá, kivi ña kútoo ní nivi koni so'o na to'on Ndios, án kivi ña on vása kútoo nivi koni so'o na to'on Ndios. Ndató'on ún saná'a ún na ña kundaa ini na yu kúu ña on vá'a ke'é na, ta ka'an kaxín ún xí'in na ña sandakoo na ké'é na ña on vá'a. Ta chikaá ún ndee ini nivi xa'a ña kundikon va'a na yichi Jesucristo. Kivi ka'an ún xí'in nivi yó'o án saná'a ún na to'on ndaa, ta xini ñó'ó xí'in ñató'ó ní ini ún ka'an ún xí'in na, ta xí'in ña ká'no ini ún saná'a ún na. ³ Chi kivi vaxi on kua'a ka nivi koni so'o na to'on ndaa, ta ndasaá kuiti kútoo na koni so'o na to'on ña sakuji ini mi na. Ta saá nivi yó'o ndukú na inka nivi na saná'a na to'on ña kútoo na koni so'o na. ⁴ Ta saá sandakoo na ña koni so'o na to'on ña ndaa, ta ndasaá kuiti chikaá so'o na cuento ña vaxi sini nivi. ⁵ Ta yó'ó, tata, ndi'i saá kivi xini ñó'ó kuu ún ta ta va'a ní xani sini, ta xini ñó'ó kúndeé ún xí'in ndi'i ña xo'vi ún. Ndi'i saá kivi va'a kasa ndivi ún chiño ña ka'an ndoso ún to'on va'a xa'a Jesucristo, ta va'a kasa ndivi ún ndi'i chiño ña ndíso ún.

⁶ Ta yí'í, xa yatin kixaā kivī ña kivī. Xa ñitaxi xí'in miī noō Ndios, ta ndatán yoō ña sókō i noō ra, saá yoō ña kivī. ⁷ Xa chikaaj̄ ndeē i xa'ā ña va'ā kundikōn̄ i yich̄i Jesucristo ta xa'ā ña kundeé̄ i noō ña on̄ vá'ā ñoyívi yó'o. Ta ndatán yoō tā xíno ta kundeé̄ ra xā ra noō xā na xíno, saá va'ā kundeé̄ i. Chi ndā ñiī kivī on̄ vása ní-sandakoō i kándixā i Jesucristo. ⁸ Ta xín̄ī ndí Ndios kúu tā va'ā ké'é̄ ñandāā xí'in ñivī. Ta ndatán yoō ñava'ā táxi na nda'ā ñivī na kundeé̄ ñixaā si'na, saá Ndios ndixa saní'i ra yí'í ñiī ñava'ā ní, saá chi ndixa kundeé̄ i kisa ndivī i chiño ña sakuiso chiño ra yí'í. Ta on̄ sivī ndasaá kuiti yí'í kúu tā naki'in ñava'ā yó'o, ta Ndios saní'i ra ñava'ā ndi'i saá ñivī na kundeé̄ ndikōn̄ yich̄i ra, ta xí'in ñasij̄ ini na ndáti na kivī ndikó Jesucristo ñoyívi yó'o.

TaPablo ndúkú ra ñava'ā noō taTimoteo

⁹ Chikāā ún ndeē ña yach̄i ní kixaā ún koto ún yí'í. ¹⁰ TaDemas sandakoō ra yí'í, chi kí'vi ní kā ini ra xíni ra ña yoō ñoyívi yó'o, ta kūāan̄ ra ñoō Tesalónica. Ta taCrescente kūāan̄ ra ñiī xiiña noō ño'ō Galacia, ta taTito, kūāan̄ ra inkā xiiña noō ño'ō Dalmacia. ¹¹ Sij̄n mató'ón taLucas yoō xí'in̄ i. Va'ā ko'on̄ ún ndukú ún taMarcos ná kixi ra xí'in̄ ún noō i, chi tayó'o kuchiño chindeé̄ ra yí'í xí'in̄ chiño yó'o. ¹² Xa t̄iví'í taTíquico kūāan̄ ra ndā ñoō Éfeso. ¹³ Ta kivī vaxi ún, ta kuni'i ún tikach̄ī ña sandakoō i ñoō Troas ve'e taCarpō. Ta saá kuni'i ún libro ña ka'vī i, ta ña

xíni ñó'ó ní ka ñoṛi kúu pergamino* kuni'i ún kixi ún nda'a i.

¹⁴ Ta taAlejandro, ta ta kisa chiño xí'in ka, xa ke'é ra ku'a ní ña on vá'a xí'in i, ta Ndios cha'vi ra tayó'o ndatán yoo ña ke'é ra xí'in i. ¹⁵ Kundaa xí'in mji ún ñoṛi taAlejandro yó'o, chi on vása xjin ra koni ra to'on ña ká'an ndoso yó.

¹⁶ Yichi ñoṛi kivi ndakuijin xa'a i ñoṛi nachiño ñoo ká'no yó'o, ta on vása ní-xiyo nda ñii nivi ña chindeé na yi'i, ta ndi'i nivi sandakoo na yi'i. Ndáti Ndios ña on saxo'vi ra nayó'o xa'a ña sandakoo na yi'i. ¹⁷ Vará on vása ní-xiyo nivi xí'in i, ta Ndios ndixa nixiyo ra xí'in i, ta taxi ra ndee nda'a i. Ta kuchiño nika'an ndoso i to'on xa'a Jesucristo ñoṛi ndi'i na ndoo ve'e chiño, ta saá ndi'i nivi na on vása kúu najudío xini so'o na ña nika'an i. Ta Ndios sakaku ra yi'i ñoṛi ña kivi i, ndatán sakaku ra ñii ta ta xa nákaa yu'u tndika'a. ¹⁸ Ta kúndaa ini i ndi ñii kiva saá Ndios sakaku ra yi'i ñoṛi ndi'i ña on vá'a, ta kundaa ra yi'i, ña kuchiño xaa i ñoyivi ñino ñoṛi xá'nda chiño ra. ¡Ná kanoo va'a ní ñato'ó Ndios ndi'i saá kivi ña vaxi! Saá ná koo ña.

To'on sondí'i ñitaa taPablo ku'a'an nda'a taTimoteo

¹⁹ Tí'vi i to'on ña chindeé ún ñaPrisca xí'in taAquila xí'in nave'e taOnesíforo. ²⁰ TaErasto ñindoo ra ñoo Corinto. Ta kivi kee i ñoo Mileto, ta taTrófimo ñindoo ra, chi ndeé ní ndó'o ra. ²¹ Chikaa ún ndee ña yachi kixi ún kivi ña ta'an

* **4:13** Pergamino kúu ñii yichi kití ña xini ñó'ó nivi kuyá xina'á xa'a ña taa na to'on ña ndaya'vi, ta chitívi na ña, ña koo va'a ña.

ka kixá'á ña vixin ní. Ta taEubulo, taPudente, taLino, ñaClaudia xí'in ndi'i inka na kándixa Jesucristo ñoo Roma yó'o tí'ví na to'on chindeé na yó'ó.

²² Jesucristo, ta xá'nda chiño noo yó, ná koo ra xí'in ún. Ná ke'é Ndios ñava'a xí'in ndi'i ndó. Saá ná koo ña.

**Alcatlatzala Mixtec New Testament
Mixtec, Alcatlatzala: Alcatlatzala Mixtec New
Testament (New Testament+)**

copyright © 2019 Wycliffe Bible Translators, Inc.

Language: Mixtec, Alcatlatzala

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Feb 2024 from source
files dated 29 Jan 2022

a74bfb3f-bd55-5ab9-983e-8d19de48c198